

Ladinità noneja: la Dominici contra i fascegn

L Consei Provinzièl no à azetà l'orden del dì de Caterina "la Rossa", che, col sostegn de Franca Penasa, l'à comentà: "In questi anni avete coperto vergognosamente di soldi il gruppo ladino Fassano"



La conseieres provinzièles Franca Penasa e Caterina Dominici.

Mendranzes - La discusion su la lege finanzièla e l bilanz de previjon tel Consei Provinzièl l'è stat l'ocajon per la conseiera Caterina Dominici de uzèr endò fora sia domana de recognosciment di nonejes desche mendranza ladina. L'orden del dì, prejentà da la "pascionaria anauniese", e sotescrit ence da etres 11 conseieres, no è stat ametù, aldò del regolament, dal President del Consei Bruno Dorigatti.

Ampò, aldèl de la costions de regolament del Consei, resta l merit de la costion. La Dominici poja sia rivendicazion sul fat che te la val de Non presciapech l 25% de la popolazion che se à declarà ladina te l'ùltim dombrament, e sun na letura destorta de la Lege nazioneła 482 del 1999 sul stravardament de la mendranzes linguistiches storiches, che recognosc l ladin desche un di 12 lengac da tutelèr. Chesta norma, defat, perveit che la Provincia delimitèe n raion olache na mendranza à da vegnir stravardèda se chest ge vegn domanà da amàncol l 15% di sentadins. N'otra possibilità sporta da la lege l'è che la popolazion se die a una te na "apposita consultazione promossa dai soggetti aventi titolo e con le modalità previste...". L dombrament de la popolazion no l'à de segur chesta carateristica ne chest obietif.

L'è de recordèr che te Fascia, amò del 1975, l'Union di Ladins aea tout sù passa 1000 sotescriziions per portèr dant na proponeta de lege populèra per arjonjer l recognosciment linguistich-

teritorièl ofizial de la mendranza ladina de Fascia, e aldò de chest del 1976 l'è stat aproà la LP 19 che disc che "I Comuni della Provincia di Trento in cui si parla il ladino sono: Campitello, Canazei, Mazzin, Moena, Pozza, Soraga e Vigo di Fassa." L'è chest l pilèster fondamentèl de nosc stravardament, n recognosciment teritorièl che dapò è stat tout sù ence te la normes de atuazion del Statut spezièl de la Region Trentin Sudtirolo, donca de livel costituzionèl. Ma chest pilèster i ladins de Fascia no i se l'à troà dal nia: l'è l frut de gran empegn e batalies da pèrt del moviment ladin.

Na "ladinità" che puza massa da interess

Somea ampò che la Dominici, piutost che n percors lonch e senester, la preferesce la scurtareles. Defat i etres gropes linguistiches de la Èlpe che rejon a n lengaz che vegn cà da chel chiamà "reto-romanzo" (romances, ladins, furlegn) i à portà inant sie percors identitèr e linguistich, enveze la Dominici no l'à volù envièr via n percors de recognosciment di nonejes (o "anauniesi", se se vel), ma l'à pissà de se tachèr ite al "tram" ladin, ajache chesta mendranza é jà recognosciuda. E che l'obietif no sie demò cultural, no se stenta a l'entener, vedù che la domana de recognosciment é stata portèda tel Consei Provinzièl proprio en ocajion de l'eam del bilanz, apontin aldò de consicidrazions economiches sui scioldi spenui per l stravardament de la mendranza ladina de Fascia.

Adertura, tel se remir percheche l'orden del dì no é stat tout sù, la Dominici, sostegnuda da Franca Penasa de la Lega, l'à dit che "in questi anni avete coperto vergognosamente di soldi il gruppo ladino Fassano".

Cuses e respostes anter UAL e Sociazion Fassa

Ence i 2 movimenc politichs de Fascia se à fat sentir su la costion de la ladinità noneja. L dì dant che la proponeta de la Dominici rue te Consei, l secretèr politich de la Sociazion Fassa, Luca Guglielmi, à manà fora n comunicat per palesèr sia forta contrarietè a la rivendicazion nonejes e domanèr a sociazions e istituzions de Fascia che les entervegne contra chest pericolous prezedent fat per enteresc economics e litèi.

L Conseier Ladin e secretèr politich de la Ual Luigi Chiocchetti à responet sobito jan ite tel merit de la costion, col rebadir la mencianza de fondamenc giuridichs de la rivendicazions de la Dominici e recordan ence che ampò l'è n 75% de jent de la Val de Non che no se recognosc ladina. Apede chest però l'à tacà duramenter la Sociazion Fassa, dijan che l'è redicol, l'è na contradizion palese e strumentèla che la fae apel per se defener dai nonejes endèna che la é aleèda de la Lega Nord, che ge dèsc gran sostegn a la cauja noneja ladina. Al comunicat de la UAL la Sociazion Fassa no é restèda muta. Pean via dal fat che somea che l problem no sie tant la "ladinità noneja", ma la posizion de la Sociazion Fassa, che no i aessa l derit de se palesèr sun chest, la presidenta Elena Testor à scrit che Chiocchetti cognessa desferenzièr so ruol de secretèr politich de la UAL da chel de Conseier ladin, ajache te chesta encèria l cognessa raprejentèr duc i fascegn, no demò chi de so partit, e l secretèr politich Guglielmi à rejonà de polemichs dejutoles, che vegn demò da la ira de Chiocchetti per esser ruà tardif, respet a la Sociazion Fassa, sun chesta costion.

Lucia Gross